

Et es ad en ganze Zigg her, do hatt ich met mingem Mann vun unser Doochter zwei Kaate för de Bläck Fööss kräge en Bonn en der Beethovenhall. Un weil ich noch nie en Bonn om Hauptbahnhoff vor, hatt ming Doochter mer en Kaat gekauft. Minge Mann, dä noch am Arbeide wor, hät gesaht: "Dann kumm ich dich ovends am Bahnhoff do avholle."

Ich fahre met dem Zog noh Bonn, kumm och aan, un wie dat esu es, han ich gedaach: "Naja, dat es wie en Kölle am Hauptbahnhoff. Wenn de bowen aanküss, geihs de de Trapp erav un dann bes de am Haupausgang."

Hatt ich äwver leider Pech gehat. En Bonn wor dat no anders, wat ich äwver vürher nit woss. Ich han dann do gewaadt un gewaadt un minge Mann hät bowen gewaadt un gewaadt, un dann es jeder noh ner Stund ärg wödigg un och traurig noh Hus gefahre. Dann han mer uns do getroffe un woren uns do am Öschele, wä jetz schold es un wä nit. Naja, dann wor dat esu wigg, dat mir zwei uns wirklich am Öschele wore.

Dann kom ming Doochter un hät gesaht: "Su, jetz es Schluss!" Se hät de Stereoanlag aangemaht, hät en CD dropgedon vun de Bläck Fööss, hät uns e Fläschche Bier opgemaht, un dann hatte mer evvens doheim e bessche Bläck Fööss gehürt un och jet gesunge un han dann natörllich och dä ganze Stress vergesse. Naja, dat wor dann evvens esu.

Hack, Kordula (63): *De Bläck Fööss en Bonn*

ʔət ʔez_ad_ŋ jantʂə tsɪk he:ɐ da had_ɪfj met miŋəm:an fən ʔʊnzəʁe dɔ:xte tsvai ka:tə fə də blek fə:s
 kʁe:jə ʔen bɔn ʔen də 'be:tho:vən,hal' ʔʊn da ʔɪfj nox ni_ɪn bɔn_əm 'həʊp:a:nɔf:ɔ: hat miŋ dɔ:xte mə ʔən
 ka:t jəkɔ:f ʔʊn miŋə man de dɔ_əm 'ʔa:beɪde vɔ hət jəzɑ:t:a kɔm_ɪfj tɪfj ʔɔ:vənts tan ʔam 'ba:nɦɔf dɔ
 'ʔafɦɔlə ʔɪfj fa: dan mið_əm tsʊx no: bɔn kʊm_ox ʔa:n ʔʊn vi dad_əzu ʔes han_ɪfj:əda:x nɔ'jɔ: dat ʔes
 vi_ɪn kœlə ʔam 'həʊp:a:n,ɦo:f:en də ʔɔvə 'ʔa:nkys je:s:ə də tʁɛb_əʁav_ʊn dan bes tɔ ʔam 'həʊp,ʔəʊsjaŋ
 had_ɪj_ave laɪde pɛfj:əhat ʔɪn bɔn vɔ dat halt ʔandes vat ʔɪz_ɛvə 'fyɐɦɛɐ nit vos ʔɪfj:an dan dɔ
 jəva:d_ʊn jəva:t ʔʊn miŋə man hət ʔɔvə jəva:t ʔun jəva:t ʔʊn dan ʔes je:də na'hɛɐ no ne ʃtʊnt ʔɛʁfj
 vɔ:dɪfj ʔʊn ʔox tʁəʊʁɪfj no hʊs jəfa:ʁə ʔʊn dan hame ʔʊns dɔ jətʁɔfə ʔʊn vʊltŋ ʔʊns dan dɔ: dʊʁz_ət
 ʔœ:fələ dan vɛ jɛʃ ʃʊld_ɛs ʔʊn vɛ nit na'ja ʔʊn dan vɔ: dat hald_əzu vɪk dat miɐ ʔʊns tsvai 'vɪʁklɪfj
 'ʁɪfjɪz_əm ʔœ:fələ vɔ:ʁə ʔʊn da kɔ:m:ɪŋ dɔ:xte ʔʊn hət jəzɑt so jɛʃ ʔes ʃlʊs dan hət_sə də
 'ʃtɛ:ʁeoʔan,la:x jəma:t hɛd_ŋ tʂe:de: 'dʁɔpʁɛdɔn fən də blek fə:s hət ʔʊnz_ə flɛʃjə bi:ɐ 'ʔɔpʁəma:t ʔʊn dan
 ha_mə halt:e'he:m_ə besjə blek fə:s jəhyɛt ʔʊn ʔox jɛt jəzʊŋə ʔʊn han dan:a'tyɐlɪfj ʔox de jantʂə ʃtʁɛs
 fɛjɛsə ʔʊn:aja dat fɔ: dan hald_əzu

